

Makalah / Article

**Penyertaan Ekonomi Wanita Melayu dalam Zaman Kesultanan Melayu:
Permulaan bagi Sebuah Perjuangan dalam Ekonomi**

**Malays' Women Economic Participation in Malay Sultanate Era: The Beginning of
a Struggle in Economics**

NORDIN HUSSIN, RAHILAH OMAR & SITI FATHIHAH ABD LATIF

ABSTRAK

Perjalanan sejarah negara hinggalah mencapai kemerdekaan telah diisi dengan pelbagai suka duka, ketabahan dan kesungguhan anak watan bagi mengubah hidup dan perjuangan menuntut hak di bumi sendiri. Wanita Melayu juga tidak ketinggalan dalam mengalami perjalanan sejarah yang sama. Wanita Melayu pada hari ini sudah mampu untuk berdiri atas kaki sendiri, dan berjuang bagi memperbaharui diri dan hidup sendiri. Bukan sahaja bagi kepentingan sendiri, malahan juga mampu meningkatkan taraf kehidupan keluarga serta menjadi antara penyumbang utama kewangan keluarga. Namun, kesenangan dan kebebasan yang kini dimiliki oleh golongan hawa ini bukanlah suatu yang mudah diperolehi. Bermula dengan zaman kesultanan Melayu, melepasi era kolonialisme sehinggalah era kemerdekaan, wanita Melayu melalui pelbagai cabaran dan kekangan. Keupayaan menembusi bidang ekonomi merupakan satu indikator penting dalam menentukan sama ada kelangsungan wanita Melayu berlaku dan dapat diteruskan. Artikel ini mengkaji penglibatan wanita Melayu dalam ekonomi melalui tiga tahap masa iaitu semasa era Kesultanan Melayu, era kolonialisme dan setelah negara mencapai kemerdekaan. Metodologi yang digunakan ialah kaedah 'content analysis' dan juga kajian kepustakaan. Kajian ini mendapati bahawa wanita Melayu sememangnya mengalami perubahan dan perkembangan terutamanya daripada aspek penglibatan dalam sektor ekonomi. Wanita Melayu hari ini semakin menyumbang sebagai tenaga buruh aktif dalam pelbagai sektor berbanding hanya sebagai pekerja sampingan tanpa upah tetap atau sebagai pekerja tidak formal.

Kata kunci: Wanita, Melayu, ekonomi, kesultanan, kolonialisme, pascamerdeka

ABSTRACT

The journey to achieve independence has been filled with grief, perseverance and determination for the rights in our own land. Malay women are not left out, struggle the same experience. Nowadays, Malay women today are able to stand on its own and not only for its own interests, but able to improve the standard of family life and become a key contributor to the family's finances. However, the fun and freedom that is now owned by the Eve is not an easy one. Starting from the Malay monarchy system, past the era of colonialism until independence, the Malay women through various challenges and constraints. The ability to penetrate the economy is an important indicator in determining the survival of the Malay women in Malaysia. This article examines the Malay women's participation in the economy through three levels of time during the Malay monarchy era, colonialism and after independence. The methodology used in the study is content analysis and literature review. This study found that the Malay woman is experiencing change and growth, particularly in the context of participation in the economic sector. Malay women are now contributing as active labor in various sectors rather than just as an employee of the side without a fixed wage or as informal workers.

Keywords: Woman, Malay, economy, monarchy, colonialism, post-independence

PENGENALAN

Meneliti perjalanan dan penyertaan wanita Melayu dalam ekonomi negara, maka dapat dilihat sejauh mana perkembangan dan perubahan yang dialami oleh golongan ini. Zaman kesultanan Melayu merupakan salah

satu tempoh dalam lipatan sejarah negara yang telah merakamkan suka dan duka golongan hawa di negara ini. Dalam kekangan institusi kesultanan yang ada kalanya mengekang kebebasan individu, wanita Melayu masih cuba mencari ruang dan peluang untuk terus melibatkan diri dan seterusnya menyumbang kepada ekonomi

negara. Dalam mengkaji penyertaan ekonomi wanita Melayu, terlebih dahulu penelitian terhadap institusi politik kesultanan Melayu seharusnya dilakukan. Hal ini disebabkan, penguasaan politik sultan Melayu akan memberikan pengaruh yang ketara juga dalam aspek ekonomi dan akan turut memberikan kesan kepada wanita Melayu dalam ekonomi.

Model kesultanan Melayu yang sesuai bagi menggambarkan keadaan sebenar institusi politik, ekonomi dan sosial di Tanah Melayu dalam era pemerintahan Melayu ialah kerajaan Melayu Melaka. Kerajaan Melayu Melaka bukan sahaja telah muncul menjadi antara kerajaan Melayu yang hebat di sekitar kepulauan Nusantara, malahan turut menjadi model dan contoh bagi kebanyakan kerajaan Melayu semasa mahupun setelah kejatuhannya. Sistem politik Melayu Melaka telah menjadi model yang ideal untuk kerajaan Melayu Semenanjung Tanah Melayu dan hingga kini telah mendasari sistem politik Malaysia (Khoo Kay Kim 1999: 1). Era Kesultanan Melayu Melaka menjadi bukti kepada kekuatan dominasi institusi beraja yang turut membawa kepada penguasaan bukan sahaja aspek politik malahan bidang ekonomi dan juga sosial. Penetapan orde politik yang selesai ditetapkan ketika pemerintahan Sultan Muhammad Shah (1424-1444) telah mengangkat Sultan sebagai individu terpenting dan memainkan peranan yang besar dalam kerajaan Melaka (Khoo Kay Kim 1999: 4). Sejarah Melayu, selaku manuskrip penting dalam historiografi Melaka telah menggambarkan kedudukan Sultan bersama-sama dengan jalur keturunan yang dikaitkan dengan kehebatan dan kebangsawanan menjadi antara ciri unik kerajaan Melaka (Andaya & Andaya 1982). Stratifikasi sosiopolitik yang diamalkan oleh kerajaan Melaka terus menetapkan pemisahan antara setiap kelas sosial dan menjadikan golongan atasan menguasai pemerintahan.

Pemisahan kelas dilakukan dalam pelbagai cara sama ada dari segi keistimewaan istiadat dan hukum adat, penggunaan bahasa 'istana' malahan dari segi pola penempatan yang berbeza. Dari aspek strategi pertahanan serta pembahagian kelas, kebanyakan sultan dan kaum kerabat baginda tinggal di kawasan bukit. Manakala golongan pembesar tertumpu di lereng-lereng bukit yang berdekatan dengan istana sultan dan mempunyai kumpulan masing-masing contohnya, kampung Bendahara, kampung Laksamana dan kampung Seri Nara Diraja. Ciri keistimewaan golongan diraja ini bukan sahaja menunjukkan kedudukan sosial mereka yang lebih tinggi malahan telah memisahkan mereka daripada kelas rakyat yang juga dikenakan larangan-larangan tertentu (Rahmat bin Saripan 1976). Hugh Clifford mengemukakan pandangan terhadap pemerintahan raja-raja Melayu yang menyebabkan rakyat tidak mempunyai hak ke atas harta, tanaman, ternakan, anak dan isteri, hatta dirinya sendiri. Segalanya merupakan milik raja dengan sebarang tindakan menentang, akan berakhir dengan hukuman yang berat (Khoo Kay Kim 1979).

Penguasaan dan dominasi sultan serta pembesar Melayu ini juga telah mengakibatkan kurangnya peluang oleh golongan rakyat dalam aspek ekonomi dalam kerajaan Melayu ketika itu. Selain kuasa yang dimiliki oleh golongan atasan dalam pentadbiran serta penggubalan undang-undang kerajaan, kuasa pemerintah juga membawa kepada pengawalan sumber ekonomi kerajaan ketika itu (Khoo Kay Kim 1999: 16). Penglibatan sultan sama ada secara langsung atau tidak langsung dalam perdagangan tradisi misalnya merupakan perkara biasa ketika itu. Sultan dan para pembesar sendiri memiliki kapal, berkongsi modal ataupun menggunakan orang tengah untuk memajukan kepentingan masing-masing (Yahaya Abu Bakar 1994). Keadaan ini sangat mempengaruhi penglibatan rakyat Melayu dalam aktiviti ekonomi. Sememangnya masih terdapat penyertaan yang tinggi dalam kalangan rakyat Melayu dalam aktiviti ekonomi. Namun, disebabkan dominasi golongan atasan, rakyat hanya dilihat turut serta dalam aktiviti ekonomi berskala kecil. Misalnya dalam bidang pertanian, meskipun masyarakat Melayu sudah ramai yang terlibat dalam pertanian dan pungutan hasil hutan, namun hanya dalam skala yang kecil. Malahan kawasan pertanian itu juga merupakan di bawah kawalan sultan kerana rakyat hanya lebih dianggap hanya mengerjakan tanah yang sebenarnya merupakan milik sultan.

Bagi penglibatan wanita terutamanya wanita Melayu, penyertaan mereka dalam aktiviti ekonomi telah bermula sejak zaman kesultanan Melayu lagi. Meskipun tidak dapat dinafikan, wanita Melayu masih lagi menjalankan peranan domestik yakni sebagai pengurus rumah tangga, menjalankan tanggungjawab sebagai isteri dan ibu. Tanggungjawab ini bersama-sama dengan tuntutan adat dan budaya masyarakat ketika itu menyebabkan wanita masih lagi kuat dengan pegangan dan peranan tersebut. Tugas mendidik anak-anak dan urusan domestik masih lagi menjadi tugas utama. Penyertaan dalam bidang ekonomi masih merupakan sebagai pembantu kepada sang suami. Dalam bidang pertanian misalnya, wanita Melayu menjadi tenaga pembantu kepada sang suami. Dalam sistem ekonomi Melayu yang menjadikan keluarga sebagai institusi yang penting dan unit pengeluaran, yakni mendapatkan sumber tenaga kerja, isteri akan bertindak sebagai tenaga kerjanya bersama-sama anak-anak dewasa.

Namun, meskipun masih menjalankan tanggungjawab domestik, wanita di zaman Kesultanan Melayu masih lagi mencapai kemajuan dalam ekonomi dengan penyertaan dalam pelbagai aktiviti ekonomi misalnya pertanian dan perdagangan. Ini dapat dibuktikan dengan catatan daripada sumber tempatan dan juga luar antaranya penulis China, Hai Yu telah menulis tentang kemunculan golongan wanita dalam bidang perniagaan terutamanya dalam perniagaan pasar malam. Kenyataan ini disokong oleh Tom Pires yang menyifatkan kegiatan perdagangan dan perniagaan oleh wanita Melayu di Melaka menjadi sumber pendapatan kepada kerajaan Melaka. Penyertaan

ekonomi oleh kaum wanita ini juga turut diceritakan oleh penulis tempatan, yakni Abdullah bin Abdul Kadir Munshi (1965) dalam buku beliau, *Kesah Pelayaran Abdullah*. Penelitian yang dilakukan beliau sewaktu pelayaran ke negeri Melayu Pantai Timur seperti Kelantan dan Terengganu serta Pahang mendapati penglibatan kaum wanita Melayu yang aktif terutamanya dalam perniagaan menjaja secara kecil-kecilan, kebanyakannya merupakan hasil tempatan seperti buah-buahan dan sayur-sayuran.

Maka apabila petanglah-hari, maka kelihatan beratus-ratus perempuan berjalan turun dari darat. Maka ada masing-masing menjunjong sa-orang satu bakul, hendak di-bawanya ka-pasar. Maka ada-lah dalam bakul itu serba jenis makanan, dan sayur-sayor, dan pisang tebu, dan segala jenis ulam-ulam, dan sa-bagai-nya.

Bagi Raymond Firth dalam kajian beliau terhadap masyarakat luar bandar terutamanya masyarakat nelayan turut mengakui peranan yang dimainkan oleh golongan wanita. Meskipun kajian beliau ke hadapan tatkala Tanah Melayu telah menerima pengaruh kolonialisme, namun hakikat terhadap peranan wanita Melayu masih dilihat berterusan dalam ekonomi. Sepanjang kajian beliau di Kelantan misalnya, hampir 25% wanita Melayu Kelantan memiliki pekerjaan yang mendatangkan pulangan secara tetap. Pekerjaan yang dilakukan bermula daripada penjualan produk perikanan sehinggalah penghasilan dan penjualan barangan seperti tikar dan tembikar (Firth 1964). Bagi Richard Winstedt, wanita Melayu menurut pemerhatian beliau, seringkali memainkan dua peranan dalam satu-satu masa, yakni sebagai pengurus hal ehwal keluarga dan juga menjana pendapatan sampingan untuk keperluan keluarga. Di setiap kawasan yang menghasilkan sumber pendapatan akan disertai oleh kaum wanita Melayu, misalnya bagi kawasan yang mengeluarkan bijih timah, maka wanita Melayu tidak akan melepaskan peluang untuk turut serta meskipun dalam perlombongan menggunakan kaedah tradisi. Begitu juga bagi pertanian getah, kaum wanita Melayu akan mengusahakan kebun getah secara kecil ataupun bekerja di estet (Winstedt 1961). Kaum wanita Melayu nyata akan terlibat dalam setiap pekerjaan yang mampu memberikan pulangan, menjadikan golongan ini sejak dahulu lagi sudah menyumbang kepada ekonomi Tanah Melayu walaupun sewaktu era kesultanan Melayu dan awal kolonialisme sumbangan masih kecil atau tidak ditekankan.

Berbalik kepada penyertaan wanita Melayu dalam era Kesultanan Melayu, satu perkara yang tidak dapat dinafikan ialah sejauh mana kedudukan dan taraf sosial mampu mempengaruhi seseorang wanita Melayu itu dalam aktiviti ekonomi. Dapat dilihat bahawa wanita Melayu dari golongan atasan dapat melibatkan diri dalam aktiviti ekonomi dengan lebih aktif. Misalnya dalam aktiviti perniagaan dan perdagangan, wanita Melayu kebanyakan hanya mampu berniaga dan berdagang secara kecil-kecil atau menjaja, namun pada peringkat

yang lebih tinggi, peluang untuk meluaskan perniagaan tidak dapat dilakukan. Berbeza dengan wanita Melayu daripada golongan bangsawan atau atasan, penglibatan dalam bidang ekonomi yang diceburi lebih terbuka luas. Faktor latar belakang dan rangkaian hubungan yang lebih luas menjadikan mereka lebih beruntung berbanding wanita Melayu bawahan. Mobiliti sosial bagi wanita Melayu kebanyakan ini tidak menjadi satu fenomena yang biasa sewaktu pemerintahan Melayu.

Antara contoh wanita kelas atasan berjaya ialah ahli perniagaan dari keturunan bangsawan seperti isteri Raja Muda Selangor bergiat dalam perniagaan bijih timah, beras dan kain. Atas faktor kedudukan, beliau turut mempunyai rangkaian hubungan yang erat dengan Francis Light yang berpusat di Ujung Salang. Selain itu, wanita Melayu Kedah dari kalangan bangsawan seperti Wan Masheran, Wan Hajar, Wan Fatimah dan Che Manjalara (isteri Sultan Abdul Hamid) juga memperoleh pengaruh politik disebabkan kekuatan dan kedudukan yang kuat dalam ekonomi.

Ternyata wanita Melayu dari golongan atasan menikmati lebih banyak peluang untuk memajukan potensi diri. Dalam pemerintahan di Alam Melayu sahaja, terdapat segelintir pemerintah wanita yang turut dicatatkan dalam lembaran sejarah kerajaan Nusantara. Beberapa karya Melayu yang menceritakan pemerintahan kerajaan yang ditadbir oleh wanita seperti kerajaan Majapahit ataupun kerajaan Kelantan Lama, namun ini berlaku juga dalam kalangan orang istana. Sejarah Melayu mencatatkan kerajaan Melayu lama seperti Bentan, Majapahit, Patani pada 1584-1688, Aceh dari tahun 1641- 1699 dan juga Ulu Kelantan, 1610-1671 juga pernah ditadbir oleh pemerintah wanita (Sha'ban Muftah Isma'il 1997). Penguasaan dalam politik akan membuka ruang untuk turut serta dalam ekonomi. Misalnya, Cik Siti Wan Kembang (1610-1667) dicatatkan selain berperanan dan pentadbiran juga turut bergiat aktif dalam bidang perdagangan hingga berkembang pusat. Kepesatan perdagangan baginda dibuktikan dengan wujudnya Mohor atau Lambang Kijang yang menjadi binatang kesayangan baginda yang telah diabadikan di muka duit atau 'pitis' yang diguna pakai ketika itu. Nyata kekuatan politik akan memberikan kelebihan dalam mengawal sumber dan kegiatan ekonomi termasuklah kepada wanita Melayu atasan.

Tuntasnya, dalam zaman Kesultanan Melayu, persoalan tentang kedudukan wanita Melayu dalam ekonomi masih tidak menjadi isu yang penting. Dalam menyoroti perkembangan wanita Melayu dalam ekonomi, seharusnya penelitian terhadap sistem pemerintahan Kesultanan Melayu seharusnya turut dilakukan. Sultan sebagai tonggak pemerintahan memiliki kuasa yang sangat tinggi serta mendominasi setiap bidang termasuk urusan ekonomi. Penguasaan ini biarpun bagi memastikan kelangsungan sesebuah kerajaan Melayu tersebut, namun jika dilihat daripada

peluang terhadap golongan wanita, maka keadaan ini akan berlainan. Masih dikuasai oleh sistem nilai dan adat, wanita Melayu masih lagi mengekalkan peranan azali, yakni sebagai isteri dan juga ibu. Peluang bagi terlibat dalam aktiviti ekonomi dengan aktif dan berada pada 'barisan hadapan' sukar untuk dilakukan.

Namun, wanita Melayu masih terlibat dalam aktiviti ekonomi yang bukan dalam skala yang besar bahkan memberikan sumbangan yang ketara dalam lingkungan bidang ekonomi yang diceburi tersebut. Perhatian terhadap wanita Melayu daripada kelas atasan lebih diberikan tumpuan. Soal latar belakang, kedudukan dalam masyarakat yang membawa kepada sumber kekayaan, modal yang tinggi berserta rangkaian hubungan yang lebih luas merangkumi masyarakat tempatan dan juga pendatang asing membezakan wanita dari golongan atasan dan wanita Melayu kebanyakan. Perjuangan wanita Melayu terutamanya daripada kelas bawahan merupakan satu langkah permulaan dengan menguasai aktiviti ekonomi pada peringkat bawah terlebih dahulu. Sumbangan dan kejayaan wanita Melayu ini sememangnya telah diakui dan dibuktikan dengan catatan dan sumber daripada luar. Meskipun masih dibelenggu dengan dominasi institusi beraja dan politik kebangsawanan, namun ternyata wanita Melayu masih cuba memberikan persaingan dan sumbangan dan ekonomi kerajaan Melayu satu ketika dahulu.

ERA KOLONIALISME: CABARAN DAN PELUANG KEPADA WANITA MELAYU DALAM EKONOMI

Sewaktu pemerintahan British, peningkatan guna tenaga wanita Melayu dalam ekonomi dipengaruhi oleh populasi golongan tersebut yang semakin meningkat tahun demi tahun. Lantas, menjadikan golongan ini semakin diperlukan dalam membangunkan beberapa sektor ekonomi terutamanya dalam sektor pertanian. Menjelang era kolonialisme terutamanya ketika pemerintahan British, kaum wanita telah memperlihatkan peningkatan potensi diri. Penyertaan dalam aktiviti ekonomi semakin positif disebabkan peluang pekerjaan yang lebih terbuka serta penawaran kerja yang lebih banyak. Namun dalam meneliti perkembangan peranan wanita Melayu dalam ekonomi Tanah Melayu sewaktu pentadbiran British, akan wujud beberapa isu yang perlu diperjelaskan. Dalam soal perbezaan tiga pentadbiran yang diamalkan, yakni Negeri Selat, Negeri Melayu Bersekutu dan juga Negeri Melayu Tidak Bersekutu menyebabkan penyertaan wanita Melayu dalam ekonomi di negeri terbabit juga berbeza. Ini berikutan tumpuan dasar British yang berlainan bagi ketiga-tiga pentadbiran tersebut. Keutamaan bagi keuntungan ekonomi terutamanya menyebabkan penglibatan ekonomi masyarakat tempatan, dalam hal ini wanita Melayu akan turut mendapat kesan. Jadual 1 memaparkan penyertaan wanita Melayu dalam ekonomi di ketiga-tiga pentadbiran negeri sewaktu kolonialisme British di Tanah Melayu.

JADUAL 1. Penyertaan Wanita Melayu Negeri Selat* dalam Ekonomi, 1921-1947

Sektor	1921	1931	1947
Perikanan	195	98	55
Pertanian	20,809	9,257	11,539
Perlombongan	0	1	1
Pekerjaan dalam penyediaan dan pengeluaran bahan dan barangan	3,789	1,579	5,623
Pengangkutan dan perhubungan	0	11	19
Perdagangan dan kewangan	592	456	293
Pentadbiran awam dan pertahanan	0	0	3
Perkhidmatan profesional	389	358	406
Hiburan dan sukan	0	11	35
Perkhidmatan personal	730	1100	327
Lain-lain	165	350	56
Tiada pekerjaan berpendapatan	73,027	94,826	115,172

* Data Negeri Selat yang dimasukkan ialah Pulau Pinang dan Melaka. Data bagi Singapura tidak dimasukkan disebabkan menjelang 1965, negara tersebut tidak lagi bernaung dalam Malaysia meskipun sewaktu kolonialisme British, Singapura merupakan salah satu wilayah kolonial British

JADUAL 2. Penyertaan Wanita Melayu Negeri Melayu Bersekutu dalam Ekonomi, 1921-1947

Sektor	1921	1931	1947
Perikanan	207	97	49
Pertanian	74,681	55,789	47,087
Perlombongan	378	215	174
Pekerjaan dalam penyediaan dan pengeluaran bahan dan barangan	3,184	1,282	11,236
Pengangkutan dan perhubungan	3	9	57
Perdagangan dan kewangan	618	429	461
Pentadbiran awam dan pertahanan	0	0	8
Perkhidmatan profesional	342	631	1169
Hiburan dan sukan	43	49	111
Perkhidmatan personal	3,218	4,003	1,199
Lain-lain	664	266	262
Tiada pekerjaan berpendapatan	229,789	213,847	321,625

JADUAL 3. Penyertaan Wanita Melayu Negeri Melayu Tidak Bersekutu dalam Ekonomi, 1921-1947

Sektor	1921	1931	1947
Perikanan	1725	880	657
Pertanian	146,932	113,225	113,916
Perlombongan	70	13	8
Pekerjaan dalam penyediaan dan pengeluaran bahan dan barangan	7,102	7,020	11,002
Pengangkutan dan perhubungan	60	50	331
Perdagangan dan kewangan	8,409	7,248	7,157
Pentadbiran awam	27	10	718
Perkhidmatan profesional	617	746	696
Hiburan dan sukan	0	189	167
Perkhidmatan personal	2,035	8,043	1,599
Lain-lain	334	1670	194
Tiada berpendapatan	245,285	377,974	679,439

Sumber: Disesuaikan daripada British Report Census, 1921-1947

Berdasarkan kepada Jadual 1, wujud perbezaan yang jelas ketara dalam pembahagian guna tenaga wanita Melayu dalam ekonomi misalnya dalam bidang pertanian. Negeri Melayu Tidak Bersekutu nyata menjadikan bidang pertanian sebagai bidang penting bagi rakyat di negeri tersebut. Penglibatan wanita Melayu dalam pertanian di negeri terbabit pada tahun 1921 mencatatkan jumlah tertinggi dengan penyertaan sebanyak 146,932. Meskipun berlaku penurunan pada tahun 1931 iaitu sebanyak 3,707 dan sedikit peningkatan pada tahun 1947, namun penyertaan wanita Melayu dalam pertanian di negeri Melayu Bersekutu masih jauh lebih tinggi berbanding wanita Melayu di negeri lain. Malahan, tumpuan diberikan ke atas penanaman padi yang merupakan sumber penting bagi negeri Melayu Tidak Bersekutu. Ini berikutan dengan peranan negeri Melayu Tidak Bersekutu sendiri yang bertanggungjawab dalam pengeluaran sumber makanan Tanah Melayu ketika itu bahkan sebelum kedatangan kolonial lagi. Menurut Newbold Thomas John, hanya negeri Kedah yang banyak mengeluarkan sumber tanaman beras, yang melebihi keperluan penduduk negerinya sendiri. Maka bekalan ini akan dieksport ke negeri lain seperti Pulau Pinang dan juga perlabuhan berdekatan. Pengeluaran tahunan negeri Melayu itu yang kini dikenali sebagai Negeri Jelapang Padi adalah sebanyak 2500 koyan. Menurut Newbold lagi, negeri Melayu Kedah dan Kelantan sejak bawah pengaruh Srivijaya lagi telah dikenal pasti dengan pertanian padi yang giat. Malahan berada bawah pengaruh Majapahit dan Thai yang terkenal dalam kaedah pengairan dan penanaman padi membantu meneruskan peranan dan sumbangan negeri Melayu tersebut dalam membekalkan sumber makanan.

Setelah British mentadbir Tanah Melayu, penumpuan kegiatan ekonomi di negeri Melayu Tidak Bersekutu masih lagi ekonomi pertanian. Selain bergantung kepada import beras dan makanan lain dari luar seperti Thailand dan Burma, negeri Melayu Tidak Bersekutu juga turut terlibat dalam penanaman padi. Lantas, dasar dan rancangan pembangunan yang dilakukan juga masih berkait dengan pertanian seperti sistem pengairan dan penyelidikan bagi menggalakkan pengeluaran. Ini diperlihatkan melalui usaha British dalam membangunkan sistem pengairan di Krian, Kelantan yang meliputi keluasan 50,000 ekar pada tahun 1906 dan pada 1937 *Krian Irrigation Extension Scheme* dilaksanakan yang menelan belanja kira-kira \$376,495. Perlaksanaan *Drainage and Irrigation Establishment* yang mentadbir hal ehwal berkaitan sistem pengairan di Tanah Melayu yang berpusat di Kuala Lumpur nyata memperlihatkan tujuan British. Negeri Melayu Tidak Bersekutu diletakkan dalam perhatian pentadbiran ini (Fraser 1939). Pada tahun 1917, ekoran daripada masalah kekurangan makanan di Burma menyebabkan import beras daripada negara tersebut tidak dapat diperolehi, maka British terus menggiatkan usaha di Tanah Melayu. Penyelidikan untuk menambahkan jumlah padi sebanyak 30% dilakukan selain pelaksanaan uji kaji

terhadap baja dan penghapus serangga serta tikus perosak. Hasilnya sehingga tahun 1937, sebanyak 142,000 ekar di *British Malaya* dilengkapi dengan sistem pengairan bagi penanaman padi dan sejak tahun 1930, sebanyak 32,000 ekar tanah telah ditambah untuk diguna bagi penanaman padi (Winstedt 1961).

Keadaan yang sama juga berlaku dalam bidang perikanan dengan negeri Melayu Tidak Bersekutu begitu bergiat aktif dalam bidang terbabit. Penyertaan dalam ekonomi perikanan sewaktu kolonialisme British masih menampakkan penguasaan oleh Negeri Melayu Tidak Bersekutu. Meskipun berlaku penurunan dari tahun ke tahun, namun angka wanita Melayu di negeri terbabit masih tinggi berbanding wanita di dua pentadbiran negeri yang lain. Sehingga akhir tahun 1947, jumlah wanita Melayu yang terlibat dalam aktiviti perikanan di Negeri Melayu Tidak Bersekutu ialah sebanyak 657 orang. Jumlah ini ternyata tinggi berbanding di Negeri Selat, yakni seramai 55 orang dan di Negeri Melayu Tidak Bersekutu seramai 49 orang. Jumlah perbezaan adalah seramai 608 orang dengan Negeri Selat dan 608 orang berbeza dengan Negeri Melayu Tidak Bersekutu. Kepentingan negeri Melayu Tidak Bersekutu terutamanya Terengganu dan Kelantan dalam perikanan masih dapat dilihat dalam era kolonialisme British. Pada 1914, sektor perikanan meliputi 14% sumber ekonomi Tanah Melayu. Pada tahun 1939, Terengganu menyumbang sebanyak 28.5% eksport dengan jumlah dagangan produk perikanan sebanyak £99,661, dengan tidak termasuk pembelian tempatan. Malahan pendapatan tahunan nelayan Kelantan serta Terengganu pada tahun tersebut adalah berjumlah £12, dengan modal £5.

Meskipun tidak mencapai kehidupan yang senang-lenang, namun penduduk di negeri berkenaan masih mampu menampung kehidupan berkeluarga dan di samping itu mengerjakan pekerjaan kampung yang lain. Keadaan inilah yang menyumbang kepada kurangnya penyertaan dalam pekerjaan 'makan gaji' di negeri berkenaan. Rakyat dilihat lebih senang untuk bekerja sendiri disebabkan kebebasan dalam pekerjaan serta kurangnya interaksi dengan pihak kolonial. Faktor ini turut menyumbang kepada wujudnya tanggapan bahawa masyarakat Melayu kurang memberi sumbangan atau terlibat aktif dalam ekonomi Tanah Melayu.

Bagi wanita di Negeri Selat, meskipun terlibat dalam pertanian, namun bilangan wanita Melayu yang terlibat dalam kegiatan penanaman padi tidak begitu menonjol. Negeri Melayu Bersekutu dan Selat yang sememangnya tidak begitu terkenal dengan penanaman padi bahkan jika ditelusuri era kerajaan Melayu Melaka lagi, negeri terbabit banyak bergantung kepada import sumber makanan daripada negeri Melayu atau kawasan lain. Sumber China mencatatkan pada tahun 1416, keadaan pertanian di kerajaan Melaka yang tidak menyerlah disebabkan tanah yang tidak sesuai dan hanya mengeluarkan sedikit sumber makanan, yakni beras menyebabkan tidak ramai yang terlibat dalam ekonomi berkenaan. Bahkan catatan

China pada tahun 1537, menceritakan bahawa Melaka tidak mempunyai bekalan beras sendiri. Ini dibuktikan lagi dengan kehadiran para pedagang terutamanya pedagang Melayu misalnya dari Jawa yang membawa produk pertanian seperti beras dan hasil hutan. Newbold pula mencatatkan dalam tahun 1839, hanya negeri Perak yang memiliki sumber makanan bagi menampung secukupnya keperluan rakyat manakala Johor pula mampu untuk mengeksport bahan tersebut ke Melaka. Bagi negeri Pahang pula, sumber makanan ini kebanyakannya diimport dari Singapura dan Melaka. Justeru menjelang era kolonialisme, keadaan yang sama berlaku. Bidang pertanian yang diceburi ini pula turut menumpukan kepada pertanian getah. Lebih ramai wanita di Negeri Selat dan Negeri Melayu Bersekutu terlibat dalam bidang ini kerana selain faktor geografi, ini dilihat mampu memberikan pulangan dan peluang mobiliti yang lebih tinggi. Ini dibuktikan dalam data yang diperoleh menunjukkan menjelang 1947, terdapat 130 orang wanita Melayu yang menjadi pemilik, pengurus atau konduktor di setiap kebun getah yang diusahakan. Bagi negeri Melayu Bersekutu juga keadaan yang sama berlaku apabila terdapat seramai 874 wanita Melayu yang bukan hanya menjadi pekerja di ladang getah yang diusahakan. Permintaan dunia ketika itu terhadap getah dilihat menjadi antara faktor penarik kepada penyertaan wanita Melayu dalam pekerjaan yang melibatkan tanaman getah. Bagi negeri Melayu Tidak Bersekutu, keadaan ini turut berlaku, namun penyertaan setiap negeri adalah sangat tidak seimbang. Meskipun ramai wanita Melayu yang turut menjadi pemilik, pengurus atau mandur yakni seramai 3,662 orang, namun hanya negeri Kelantan dan Johor yang ramai terlibat iaitu seramai 1,320 orang dan Negeri Johor mencatatkan bilangan wanita Melayu tertinggi menjadi pemilik, pengurus atau konduktor (mandur) di negeri Melayu Tidak Bersekutu yakni seramai 2,112 orang.

Kehadiran pihak British yang bertujuan atas faktor keuntungan semata-mata menyebabkan British lebih memberikan tumpuan terhadap Negeri Melayu Bersekutu. Tumpuan yang kurang diberikan dalam bidang lain menyebabkan Negeri Melayu Tidak Bersekutu lebih banyak bergantung kepada sumber pertanian. Tidak seperti negeri Melayu lain yang lebih membuka ruang kepada pelbagai pekerjaan baru, jelas keinginan British yang menjadikan negeri Melayu Tidak Bersekutu ini sebagai pengeluar sumber makanan. Faktor peranan penjajah dan tidak dinafikan faktor geografi di kawasan Negeri Melayu Tidak Bersekutu sekali gus menyekat pembangunan wanita Melayu di negeri tersebut untuk terlibat lebih aktif dalam bidang lain terutamanya bidang professional dan pentadbiran kerajaan. Wanita Melayu di Negeri Melayu Tidak Bersekutu juga dilihat masih lagi meneruskan peranan domestik yang dimainkan menyebabkan mereka menjadi tenaga buruh yang tidak aktif bagi pembangunan ekonomi.

Selain itu, dalam pengkhususan bidang kerja berkaitan pembuatan serta pengeluaran produk atau bahan seni dan tempatan, penyertaan wanita di Negeri Melayu Tidak Bersekutu juga lebih tinggi berbanding di negeri Melayu Bersekutu dan juga Negeri Selat. Misalnya dalam pekerjaan yang melibatkan pengeluaran barangan berasaskan produk kayu-kayan, rotan atau menghasilkan tekstil dan tenunan. Jadual 1 menunjukkan kenaikan peningkatan wanita Melayu di Negeri Melayu tidak Bersekutu dalam bidang penyediaan dan pengeluaran bahan dan barangan sejak 1921 hingga 1947. Pada tahun 1921, hanya seramai 7,102 orang wanita yang terlibat dan sedikit menurun pada 1931 seramai 82 orang, namun pada 1947 peningkatan berlaku seramai 3,982 orang atau 11,002 orang wanita Melayu yang terlibat dalam sektor ekonomi berkenaan. Kebanyakan wanita ini terlibat dalam sub-kerja berkaitan penghasilan barangan rotan seta tenunan terutamanya dari Terengganu juga pengeluaran bahan makanan. Ini ditambah dengan faktor majoriti wanita ini memiliki kebebasan masa kerja disebabkan tidak bekerja 'makan gaji' dan adakalanya mempunyai lebih daripada satu pekerjaan. Berbeza keadaan ini di Negeri Melayu Bersekutu, apabila berlaku penurunan walaupun pada awal tahun 1921, jumlah wanita Melayu yang terlibat dalam sektor penyediaan serta pengeluaran bahan serta barangan adalah tinggi, iaitu seramai 3,184 orang. Namun pada tahun 1947, jumlah ini menurun kepada 11,236 orang sahaja. Bagi Negeri Selat pula, penglibatan wanita Melayu dalam sektor terbabit meningkat tahun demi tahun dengan jumlah pada 1947 ialah seramai 5,623 orang dengan 3,952 orang adalah terlibat dalam penghasilan produk rotan di Melaka.

Faktor sejarah serta peralihan tampuk pentadbiran ke tangan British yang masih baru menyebabkan pemeliharaan kesenian serta kebudayaan tempatan negeri terbabit lebih baik berbanding di negeri Melayu yang lain. Ini ditambahkan lagi dengan sikap British sendiri yang tidak memberikan halangan dalam bentuk undang-undang mahupun peraturan. Berbeza dengan negeri Selat dan negeri Melayu Bersekutu yang sememangnya ditumpukan bagi melaksanakan pelan pembangunan, aktiviti ekonomi yang dijalankan seharusnya akan memberikan pulangan keuntungan kepada British. Bahkan tarikan terhadap pekerjaan lain juga berlaku dalam kalangan wanita Melayu di negeri terbabit. Ini misalnya diperlihatkan dalam bidang perlombongan yang ada kurun ke-19 dan 20 merupakan bidang yang memberikan keuntungan kepada kolonial.

Melalui Jadual 1, dapat dilihat sejauh mana penglibatan wanita Melayu dalam bidang perniagaan. Sub-kerja yang diletakkan dalam sektor perdagangan dan kewangan ini turut memperlihatkan penyertaan wanita Melayu yang tinggi dalam perniagaan terutamanya dalam penubuhan kedai bersaiz kecil dan juga menjadi penjaja. Bagi Negeri Selat, jumlah wanita yang terlibat sebagai penjaja dan pemilik kedai ialah seramai 250

orang dan pada 1947 meningkat kepada 324 orang. Pada tahun 1931, seramai 333 orang telah menjalankan perniagaan kecilan-kecilan, namun angka ini menurun kepada 207 orang pada tahun 1947. Bagi negeri Melayu Tidak Bersekutu, penyertaan wanita Melayu dalam sub-kerja ini begitu menonjol berbanding negeri lain. Pada tahun 1931, seramai 2,392 orang telah menjadi tenaga kerja dalam perniagaan sama ada membuka kedai mahupun menjalankan perniagaan secara menjaja. Jumlah ini telah meningkat pada tahun 1947, yakni hanya seramai 5,940 orang sahaja yang terlibat. Namun penekanan harus diberikan kepada wanita Melayu di Kelantan dan juga Terengganu, yang masing-masing memiliki 1,109 orang wanita pada 1931 dan pada tahun 1947 seramai 3,464 orang wanita Melayu yang bekerja dalam bidang perniagaan. Bagi negeri Terengganu pula, seramai 1,957 orang pada tahun 1931 dan 1,208 orang pada tahun 1948 telah terlibat dalam bidang perniagaan kecil-kecilan.

Perbezaan pentadbiran British juga menyebabkan berlakunya penawaran pekerjaan yang berbeza antara negeri-negeri Melayu di Tanah Melayu. Pentadbiran British yang lebih lama di Negeri Selat dan juga Negeri Melayu Bersekutu dan dirumitkan dengan pemilihan tumpuan yang lebih ke atas negeri terbabit menyebabkan penawaran pekerjaan dalam bidang pentadbiran awam lebih terbuka di negeri tersebut (Shamhuri Siwar dan Surtahman Kastin Hasan 1999). Wanita Melayu lebih mudah untuk bersaing disebabkan peluang yang diberikan lebih terbuka membolehkan golongan ini tidak hanya tertumpu kepada satu bidang pekerjaan sahaja. Peluang pekerjaan yang diberikan oleh pihak British kepada wanita Melayu di Negeri Selat serta Negeri Melayu Bersekutu juga menggambarkan potensi yang lebih dimiliki oleh golongan hawa di negeri tersebut. Ini disebabkan oleh penguasaan pengetahuan serta kemahiran yang lebih dimiliki oleh mereka. Perbezaan tahap pendidikan yang membawa kepada perbezaan

peluang dalam aktiviti ekonomi jelas tergambar apabila menyoroti perkembangan penyertaan wanita Melayu dalam ekonomi di Tanah Melayu.

Kadar buta huruf nyata ketara dalam kalangan wanita Melayu di Negeri Melayu Tidak Bersekutu dengan jumlah wanita Melayu yang celik huruf hanya 7,250 orang daripada 500,218 orang kesemuanya. Begitu juga bagi Negeri Selat pula, jumlah wanita Melayu yang celik huruf ialah seramai 7,873 orang daripada 109,358 orang. Ini berbeza apabila dilihat kepada jumlah wanita Melayu yang celik huruf di Negeri Melayu Bersekutu yakni seramai 23,391 orang daripada 276,906 orang kesemuanya. Faktor pendidikan telah menyumbang kepada halangan bagi wanita Melayu untuk lebih berminat kepada bidang pekerjaan yang memerlukan kepada pengetahuan dan kemahiran. Pendidikan tidak formal dalam keluarga atau pendidikan rendah akan menyebabkan wanita Melayu di negeri terbabit lebih memilih untuk meneruskan aktiviti ekonomi keluarga. Pemilihan pasangan hidup daripada latar belakang keluarga yang sama juga akan mempengaruhi pilihan wanita Melayu untuk terus memainkan peranan domestik atau sebagai pembantu keluarga. Ini dibuktikan dengan kadar wanita Melayu yang tidak bekerja dan hanya menjadi suri rumah. Wanita Melayu di negeri Melayu Tidak Bersekutu lebih banyak yang tidak mempunyai pekerjaan tetap dan berkemungkinan tahap pendidikan juga menjadi salah satu faktor berlakunya keadaan sedemikian.

Ini membuktikan bahawa antara faktor wanita Melayu negeri Melayu Tidak Bersekutu yang lebih ketinggalan dalam pembangunan ekonomi ialah disebabkan oleh faktor pendidikan. Kepelbagaian jenis institusi pendidikan yang lebih banyak terdapat di negeri Melayu Bersekutu membolehkan wanita Melayu terutamanya yang berasal daripada golongan atasan berpeluang untuk mencuba serta mengasah potensi diri mereka lebih baik. Ini sekali gus menjadi satu kelebihan

JADUAL 4. Bilangan Celik Huruf dalam Kalangan Wanita Melayu dalam Mana-mana Bahasa dan Bahasa Inggeris, 1931

Negeri	Kemahiran	Literasi dalam	Mana-mana Bahasa	Kemahiran	Literasi dalam	Bahasa Inggeris
	Celik Huruf	Buta Huruf	Literasi Per 1000 orang	Celik Huruf	Buta Huruf	Literasi Per 1000 orang
Penang	5,859	53,489	40	141	62,207	2
Melaka	2,014	47,996	99	52	49,958	1
Perak	12,741	116,459	99	129	129,071	1
Selangor	5,322	50,886	95	127	56,081	2
N.Sembilan	2,959	40,055	69	33	42,981	1
Pahang	2,369	46,115	49	15	48,469	0.3
Kedah	2,641	138,851	31	70	108,790	0.6
Kelantan	704	164,927	18	57	141,441	0.36
Terengganu	507	83,728	4	42	84,231	0.05
Johor	3,398	105,462	6	70	108,790	0.6

Sumber: C. A Vlieland. British Malaya: A Report on the 1931 Census and on Certain Problems of Vital Statistic. London: The Crown Agent for the Colonies. 1932

kepada wanita Melayu di negeri terbabit untuk bersaing dengan wanita daripada kaum yang lain. Dalam bidang profesional yang lebih memerlukan pengetahuan dan kemahiran yang khusus, wanita Melayu di negeri Melayu Bersekutu nyata memiliki kelebihan.

Mendekati tempoh selepas Perang Dunia Kedua, perubahan sikap dan kesedaran dalam kalangan wanita Melayu semakin terserlah. Namun, isu dan perjuangan politik merupakan aspek yang lebih dititikberatkan ketika itu. Perjuangan memerangi penjajah dan menuntut hak di tanah air sendiri menjadi isu yang penting. Perjuangan wanita Melayu dan timbulnya semangat anti-Malayan Union telah membawa kepada kemunculan pertubuhan politik yang dianggotai oleh wanita Melayu seperti Angkatan Wanita Sedar (AWAS). Selain AWAS, kebangkitan wanita Melayu dalam pergerakan menentang penjajah ini juga terlihat dengan penubuhan kaum Ibu UMNO pada 25 Ogos 1949 (Mohamad Abu Bakar 1986). Ini diikuti juga dengan kesedaran wanita Melayu dalam pendidikan yang turut memberi kesan kepada penglibatan wanita Melayu dalam arus politik serta penyertaan dalam ekonomi negara. Dalam tahun 1935, hanya terdapat 5,000 pelajar perempuan di sekolah di seluruh Semenanjung Tanah Melayu, tetapi dalam tahun 1946, jumlah tersebut telah meningkat kepada 60,000 pelajar. Ini diikuti oleh penubuhan institusi pendidikan tinggi seperti Malay Girls College pada tahun 1947 dan penawaran khusus perguruan di maktab seperti Kirby dan Brinsford Lodge yang membolehkan wanita Melayu mendapat pendidikan yang lebih tinggi.

Perubahan kesedaran ini berlaku secara berperingkat yang seterusnya membawa kepada peralihan sikap serta mengubah pandangan wanita Melayu terhadap hak dan kedudukan mereka di Tanah Melayu. Isu ekonomi juga mula dimainkan oleh pemimpin dan generasi pasca Perang Dunia Kedua yang lebih agresif dan menampakkan persaingan yang lebih kuat antara wanita kaum lain. Peluang pendidikan yang lebih terbuka kepada bangsa Melayu memberikan harapan baru

kepada golongan wanita Melayu. Tahun demi tahun golongan ini dapat berpeluang menerima pendidikan dan kemahiran yang lebih baik. Dapat dilihat bahawa sejak berakhirnya Perang Dunia Kedua, pendidikan di Tanah Melayu semakin baik dan sistematik. Peruntukan yang dikeluarkan bagi memperbaiki sistem pendidikan negara merupakan isu yang penting dibincangkan oleh pihak kolonial dan terus didesak oleh anak-anak tempatan yang kini semakin terbuka minda dan pemikirannya.

Perhatian terhadap keperluan pendidikan bagi golongan wanita Melayu juga terdampak dengan penambahan pelajar dan sekolah Melayu. Dari tahun 1947 hingga 1953, peratus pelajar perempuan di sekolah Melayu telah meningkat dari 21% kepada 38%. Peningkatan ini membanggakan, memandangkan sebelum perang, yakni pada tahun 1941, peratus yang dicatatkan hanyalah sebanyak 16%. Penubuhan sekolah yang mengkhususkan kepada kraftangan dan kesenian pada tahun 1952 juga telah memberikan peluang kepada wanita Melayu untuk menimba pengetahuan dengan kaedah yang lebih intensif dan sistematik. Namun, keadaan positif ini tidak hanya ditumpukan kepada pembangunan bangsa dan wanita Melayu sahaja. Seiring dengan itu, bangsa lain di negara ini turut sama membangun sama ada dari segi ekonomi mahupun pendidikan. Bangsa dan wanita Melayu masih lagi harus berusaha bagi mengejar bangsa lain untuk turut sama membangunkan taraf dan pembangunan bangsa masing-masing.

Nyata, dalam meninjau perkembangan penyertaan wanita Melayu dalam ekonomi negara, isu pendidikan tidak dapat dipisahkan. Pendidikan, ilmu pengetahuan dan kemahiran menjadi landasan kepada wanita Melayu bahkan wanita seantero dunia untuk lebih memajukan diri. Pendidikan yang diterima ini akan lebih membuka ruang bagi wanita Melayu untuk lebih bersaing dan memajukan diri dalam pelbagai bidang ekonomi. Keadaan ini telah memberikan banyak impak yang seterusnya membawa kepada penggunaan guna tenaga wanita Melayu ini mula

JADUAL 5. Kemasukan Pelajar Peringkat Rendah dan Penubuhan Sekolah dalam Persekutuan Tanah Melayu, 1947-1953

Bil Pelajar/Tahun	1947	1948	1949	1950	1951	1952	1953
Inggeris	61,059	67,827	72,906	82,946	92,072	91,604	97,864
Melayu	170,693	206,223	271,909	265,335	287,413	309,526	338,105
Cina	180,999	179,851	198,126	210,336	199,414	213,683	236,041
India	35,479	35,456	38,743	38,833	37,100	38,859	43,257
Jumlah	448,230	489,357	581,684	597,450	615,999	653,672	715,267
Jenis Sekolah	1947	1948	1949	1950	1951	1952	1953
Inggeris	197	210	224	244	253	272	325
Melayu	1,231	1,321	1,432	1,609	1,772	1,955	2,055
Cina	1,379	1,362	1,338	1,319	1,168	1,199	1,215
India	843	890	889	881	861	854	869
Jumlah	3,650	3,783	3,883	4,053	4,054	4,280	4,464

Sumber: International Bank for Reconstruction and Development. *Report on the Economic Development of Malaya*. London: John Hopkins Press. 1955. hlm. 463

mengalami anjakan selepas kemerdekaan menjadi milik Tanah Melayu.

Tuntasnya, wanita Melayu telah menghadapi satu proses perkembangan dan perubahan yang telah meletakkan golongan ini pada kedudukan hari ini. Melewati zaman kesultanan Melayu, wanita Melayu masih banyak berpegang kepada sistem nilai dan adat. Persoalan bagi memajukan potensi bukanlah merupakan isu yang perlu diketengahkan. Era penjajahan memberikan satu kesedaran kepada golongan hawa ini. Dihimpit dengan tekanan penjajah, persaingan dengan wanita dan kaum lain sedikit sebanyak telah membuka mata wanita Melayu untuk lebih terlibat dalam aktiviti ekonomi. Perubahan kesedaran dan peranan dalam ekonomi ini berlaku secara berperingkat. Bagi wanita di negeri Melayu Bersekutu, faktor persekitaran yang dikelilingi oleh kaum lain, tahap pendidikan dan kemahiran serta penawaran pekerjaan yang lebih pelbagai memberikan kelebihan untuk mereka lebih mengasah potensi diri. Dalam kesengsaraan menghadapi kolonialisme, wanita Melayu mula bangkit untuk mengubah bukan sahaja diri dan keluarga malahan bangsa Melayu di tanah air sendiri.

Sememangnya dapat dilihat bahawa perjuangan wanita dalam memperbaiki kehidupan dan ekonomi terutamanya bukanlah satu perjalanan yang mudah dan singkat. Kedudukan yang dicapai serta peluang yang diberikan oleh masyarakat dan pimpinan tertinggi pada hari ini merupakan satu manifestasi kejayaan wanita sejak dari zaman dahulu lagi. Bagi wanita Melayu meskipun telah lama menjadi rakyat negara ini, namun hak dan kuasa yang dimiliki mereka masih lagi samar-samar pada mulanya. Dikekang dengan adat dan pemikiran yang ada kalanya dilihat seakan-akan mengongkong menjadi antara faktor kemunduran mereka. Pemikiran feodalisme yang diamalkan juga menjadi satu diskriminasi kepada golongan wanita Melayu untuk turut sama terlibat dalam ekonomi secara aktif. Kemunculan golongan imigran sekali lagi menambahkan beban yang ditanggung oleh golongan ini. Terpaksa berjuang, merebut peluang yang ada meskipun dengan keadaan dan pemikiran penjajah yang ‘memilih bulu’ dalam pengagihan ekonomi dan kekayaan bagi keuntungan mereka sendiri. Hanya apabila masyarakat Melayu sudah mulai serik dengan keadaan dan tekanan yang dihadapi, barulah usaha kepada mengubah keadaan tersebut berlaku. Perjuangan bagi memberikan lebih peluang kepada masyarakat Melayu mula disuarakan, hari demi hari semakin lantang. Masyarakat Melayu bagaikan tersedar dari tidur yang lena dan bahang perjuangan ini turut sama dirasai oleh golongan wanita Melayu.

Jika sebelum merdeka, perjuangan ini lebih kepada memberikan lebih keadilan yang sama rata kepada semua kaum di Tanah Melayu. Namun, perjuangan kemerdekaan yang dilaungkan adalah untuk bukan sahaja menjadikan Tanah Melayu sebagai negara yang berdaulat malahan hak dan kuasa pengurusan dan pemerintahan diberikan kepada anak watan. Wanita Melayu tidak dapat dinafikan

mengharapkan agar kemerdekaan yang dicapai akan mampu memberikan satu lagi jaminan yang kukuh bahawa golongan mereka akan terus dibela dan akan lebih mendapat perhatian. Bahagian seterusnya akan melihat sejauh mana kedudukan wanita dan wanita Melayu khasnya dalam aspek penyertaan ekonomi dan pembangunan negara. Adakah kemerdekaan akan mampu menjadi era baru kepada wanita Melayu untuk berpeluang bersaing dalam bidang ekonomi dan seterusnya menjadi penyumbang guna tenaga tinggi bagi negara.

PASCAKEMERDEKAAN HINGGA KINI: KEBANGKITAN WANITA MELAYU DARI ASPEK PENYERTAAN DALAM EKONOMI

Kemerdekaan yang dicapai negara merupakan satu lagi tempoh yang signifikan dalam meneliti perkembangan penglibatan wanita Melayu dalam ekonomi negara. Tidak membandingkan hanya kepada penglibatan wanita dari kaum lain, nyata wanita Melayu juga masih memperlihatkan peningkatan daripada tahap penyertaan dalam ekonomi di Tanah Melayu. Meskipun wanita Melayu masih dilihat ketinggalan berbanding kaum lain, namun masih terlihat wujudnya perkembangan yang lebih positif terhadap penglibatan wanita Melayu dalam industri lain selain pertanian. Walaupun masih tertumpu kepada pertanian, namun industri lain juga mula menjadi pilihan kepada wanita Melayu. Titik penting dalam anjakan penggunaan guna tenaga wanita Melayu juga berlaku pada tahun 1957 berbeza dengan wanita Cina yang lebih dahulu ke hadapan sekitar tahun 1930-an lagi.

JADUAL 6. Penyertaan Wanita Mengikut Kaum dalam Industri Terpilih, 1957

Industri	Melayu	Cina	India	Lain-lain
Pertanian, perhutanan dan perikanan	136,204	20,955	561	2,075
Pertanian yang memerlukan proses lanjutan	81,408	87,867	71,891	356
Perlombongan	247	8,703	505	18
Pembuatan	8,889	13,448	149	59
Pembinaan	108	3,733	1,485	36
Perkhidmatan lain	14,060	38,618	5,536	2,833
Tidak bekerja (mempunyai keinginan bekerja)	2,353	2,912	999	134

Sumber: Federation of Malaya 1957: Report No. 13. hlm. 102-110

Bidang pembuatan dan perkhidmatan terutamanya dalam pengkhususan dalam perkhidmatan berasaskan pendidikan dan kesihatan menjadi antara bidang pekerjaan yang kini menjadi pilihan kepada wanita Melayu. Tahap pendidikan yang semakin baik membolehkan wanita Melayu semakin mudah untuk menceburkan diri dalam bidang pekerjaan yang dahulunya tidak dapat dipenuhi atas faktor tidak mencapai kelayakan pendidikan yang

diminta. Namun, tidak dapat dinafikan wanita Melayu menjelang kemerdekaan masih ketinggalan berbanding wanita kaum lain dalam sektor pekerjaan selain pertanian. Berdasarkan kepada data di atas, dapat dilihat bahawa wanita Melayu masih lagi menjadikan bidang pertanian sebagai antara pilihan utama dengan penyertaan sebanyak 136,204 orang. Keadaan ini berbeza dengan wanita daripada kaum Cina misalnya, kesedaran serta penyertaan ekonomi yang lebih ke hadapan menyebabkan golongan ini meskipun memilih bidang pertanian, namun lebih bercorak komersial. Ini terbukti dengan penglibatan wanita Cina seramai 87,867 orang pada tahun 1957. Dalam sektor lain juga wanita bukan Melayu lebih tinggi penglibatannya. Sektor seperti pembinaan dan pembuatan yang semakin luas sejak negara mula mencapai kemerdekaan nyata lebih dikuasai oleh wanita kaum lain.

Secara umumnya, bukan hanya wanita Melayu malahan kaum Melayu masih lagi ketinggalan dalam mengejar pembangunan seterusnya lebih ke hadapan dalam sektor ekonomi negara. Kemunduran ekonomi ini turut sama mengheret negara kepada masalah sosial dan hubungan antara kaum ketika itu. Hakikat ini akhirnya terbukti dengan terjadinya peristiwa hitam 13 Mei 1969 yang merupakan titik hitam dalam sejarah perpaduan Malaysia. Ketidakeimbangan ekonomi antara kaum serta masalah kemiskinan yang melanda telah membawa kepada perubahan dasar kerajaan. Perlaksanaan Dasar Ekonomi Baru dilakukan bagi mengubah dan memperbaiki taraf ekonomi negara dan rakyat agar tidak akan berlaku lagi sejarah 13 Mei untuk kali kedua. Pada tahun 1970, pendapatan purata keluarga Melayu ialah sebanyak RM179 sebulan sedangkan keluarga Cina berjumlah RM387 dan keluarga India sebanyak RM310 sebulan. Berdasarkan kepada kadar pendapatan pula, sebanyak 22.9% kaum Melayu berada dalam pendapatan kurang daripada RM100 sebulan. Penglibatan wanita keseluruhannya mula menampakkan peningkatan lebih berbanding pada tahun 1957.

Berbanding kaum lelaki, nyata kaum wanita menampakkan prestasi yang lebih positif. Bagi bangsa Melayu, penglibatan wanita Melayu semakin meningkat daripada 24% pada tahun 1957 kepada 31% pada tahun 1970. Begitu juga kaum Cina, golongan wanitanya lebih menampakkan peningkatan sebanyak 5% pada tahun 1970. Namun bagi kaum India, ternyata golongan lelaki lebih memperlihatkan perkembangan positif dengan kenaikan sebanyak 2% kepada 85% pada tahun 1970. Keadaan prestasi penglibatan ekonomi yang tidak seimbang ini juga menyebabkan langkah diambil kerajaan dalam kerangka Dasar Ekonomi Baru terus dilaksanakan. Dasar bertujuan bagi membasmi kemiskinan dan juga menyusun kembali masyarakat dengan mengurangkan jurang perbezaan dari segi pendapatan, guna tenaga dan hak milik serta pengurusan harta yang produktif dalam ekonomi. Nyata. Dasar Ekonomi Baru lebih menggalakkan kepada pembangunan ekonomi negara

JADUAL 7. Kadar Penyertaan dalam Ekonomi, 1921- 1970 (%)

Bangsa/ Jantina	1921	1931	1947	1957	1970
Melayu					
Lelaki	86	82	77	75	66
Perempuan	52	34	25	24	31
Cina					
Lelaki	91	90	75	71	66
Perempuan	25	20	21	25	30
India					
Lelaki	95	93	88	83	85
Perempuan	72	57	50	46	30
Lelaki	90	88	77	75	66
Perempuan	45	32	25	26	31

Sumber: Donald L.P Lee. 1984. *Female Labour Supply in Malaysia*. Phd Thesis. Department of Political Economy. University College London. hlm. 22

dengan peningkatan pelbagai sektor industri mula diberikan tumpuan.

Meneliti perkembangan wanita Melayu dalam ekonomi negara pascamerdeka seterusnya selepas DEB, dapat dijelaskan bahawa wujudnya kaitan antara penyertaan wanita Melayu serta pelaksanaan pelbagai pelan pembangunan negara. Seajar dengan Misi Pertubuhan Bangsa-bangsa Bersatu sendiri dalam pelaksanaan Dekad Wanita, Dasar Ekonomi Baru (DEB) merupakan langkah yang berkesan bagi terus mempromosikan peningkatan guna tenaga wanita dalam setiap sektor ekonomi Negara (Nik Safiah Karim 1990). Di samping dapat membuka peluang kepada wanita, pembangunan negara juga akan dapat dipastikan.

JADUAL 8. Pembahagian Guna Tenaga Melayu Mengikut Industri, 1975 dan 1980 (%)

Industri	1975	1980
Pertanian, perhutanan, ternakan dan perikanan	28.4	18.4
Pertanian (proses tambahan)	27.3	25.6
Perlombongan dan kuari	0.7	0.6
Pembuatan	9.7	13.4
Pembinaan	2.7	3.7
Elektrik, gas, air dan sanitari	1.3	1.9
Pengangkutan, penyimpanan dan komunikasi	3.7	4.3
Perdagangan	8.2	9.7
Perkhidmatan	18.0	22.3

Sumber: Disesuaikan daripada Report of the Labour Force Survey. 1975 & 1980. Department of Statistic. Kuala Lumpur

Peralihan tenaga buruh Melayu terutamanya dalam sektor perkilangan dan pembuatan merupakan salah satu ciri penting dalam meneliti perkembangan penyertaan kaum dan wanita Melayu. Dasar Ekonomi Baru yang

menggalakkan kepada penyertaan aktif dalam setiap sektor ekonomi bagi mengurangkan jurang kekayaan antara kaum nyata memberikan kesan kepada masyarakat Melayu (Hasnah Ali 1996). Dapat diperhatikan bahawa wujud peningkatan dalam penyertaan kaum Melayu dalam sektor seperti pembuatan dan juga perdagangan. Dalam sektor pembuatan misalnya, kenaikan sebanyak 3.7% daripada 9.7% pada tahun 1975 nyata menunjukkan kesan yang baik. Begitu juga dalam bidang perdagangan yang meningkat daripada 8.2% kepada 9.7% dapat membantu kepada pembangunan kaum Melayu. Meskipun masih jauh dan masih banyak usaha yang perlu dilakukan bagi terus mengurangkan jurang ekonomi yang wujud antara kaum. Namun keadaan ini telah membuka peluang untuk kaum dan wanita Melayu terlibat dalam pelbagai sektor bahkan lebih terbuka dan bebas melakukan pilihan pekerjaan.

Tumpuan kerajaan yang kini tidak hanya kepada sektor pertama seperti pertanian dan peningkatan kepada industri kedua dan ketiga terutamanya pengeluaran dan pembuatan turut sama memberi kesan kepada wanita Melayu. Ini berikutan dengan terlaksananya Pelan Induk Perindustrian. Pelan Induk Perindustrian ini dirangka untuk menjana kadar pertumbuhan sektor pembuatan bagi tempoh 10 tahun iaitu dari 1986 hingga 1995. Terdapat tiga objektif utama Pelan Induk Perindustrian ini iaitu pertama, mempercepatkan pertumbuhan sektor pembuatan bagi menentukan satu perkembangan ekonomi yang pesat dan menyediakan asas bagi memenuhi matlamat sosial selari dengan DEB. Kedua, menggalakkan peluang bagi penggunaan sumber asli negara secara maksimum dan cekap. Ketiga, membina asas bagi menuju ke arah sebuah negara perindustrian yang maju dalam jangka masa yang ditentukan melalui pertambahan keupayaan teknologi Melalui Pelan Induk Perindustrian ini, penglibatan wanita dapat ditingkatkan ekoran wujudnya keutamaan industri, dasar industri berat, pembangunan teknologi dan pembangunan guna tenaga. Penawaran pekerjaan dalam sektor pembuatan misalnya menyebabkan penyertaan wanita Melayu dan kaum Melayu amnya dalam sektor pertanian semakin berkurangan. Ini juga merupakan ciri lain dalam perkembangan ekonomi Melayu. Pertanian tidak lagi menjadi satu-satunya sektor ekonomi yang akan diceburi oleh golongan ini.

Penghijrahan wanita Melayu luar bandar ke kawasan bandar dan terlibat dalam sektor terbabit merupakan satu fenomena yang biasa sekitar tahun 1970 dan 80-an. Permintaan terhadap guna tenaga dalam sektor perkilangan misalnya, telah membawa kepada penghijrahan wanita Melayu dari segi geografi dan juga bidang pekerjaan. Faktor tolakan yakni kurangnya peluang pekerjaan di kawasan luar bandar menjadi elemen penting yang membawa kepada fenomena ini berlaku. Begitu juga dengan keadaan pembangunan perindustrian di Semenanjung Malaysia yang kebanyakannya tertumpu di kawasan berhampiran bandar telah menarik wanita luar bandar mencari rezeki di bandar dan kota besar (Jamilah

JADUAL 9. Penyertaan dalam Sektor Pertanian Negara, 1921-1957

Kaum/Jantina	1921	1931	1947	1957	1970
Melayu					
Lelaki	0.82	0.79	0.74	0.65	0.58
Perempuan	0.85	0.82	0.83	0.85	0.67
Cina					
Lelaki	0.34	0.37	0.36	0.26	0.23
Perempuan	0.37	0.44	0.5	0.46	0.34
India					
Lelaki	0.55	0.45	0.42	0.35	0.31
Perempuan	0.88	0.83	0.9	0.87	0.61

Sumber: Donald L.P Lee. 1984. *Female Labour Supply in Malaysia*. PhD. Thesis. Department of Political Economy. University College London. hlm. 22.

Ariffin 1978). Dasar Ekonomi Baru yang mengunjurkan agar 50% guna tenaga di sektor perkilangan ini terdiri daripada kaum Melayu juga menyebabkan penawaran pekerjaan ini terbuka luas kepada wanita Melayu terutamanya dari luar bandar untuk berhijrah. Penubuhan HAWA yang bertanggungjawab memantau kebajikan pekerja wanita Melayu juga memperlihatkan penumpuan terhadap golongan tersebut serta penglibatan wanita Melayu yang semakin tinggi dalam sektor pembuatan dan juga pengeluaran. Penghijrahan wanita Melayu merupakan sebagai salah satu tanda peningkatan penyertaan golongan tersebut dalam bidang ekonomi.

Keinginan bagi memajukan potensi diri dan meningkatkan taraf hidup keluarga telah menjadikan golongan semakin menampakkan peranan mereka dalam pembangunan ekonomi negara. Seperti yang diterangkan sebelum ini, dasar Dekad Wanita nyata membantu ke arah peningkatan ekonomi wanita di Malaysia. Bagi wanita Melayu, penyertaan ekonomi yang semakin baik ini sangat bergantung kepada tahap pendidikan yang semakin baik. Pendidikan dan tahap kemahiran yang setiap tahun meningkat dalam kalangan wanita Melayu telah mampu meletakkan mereka untuk terus bersaing dengan tenaga buruh dari kaum dan gender berlainan. Seiring dengan Dasar Wanita Negara yang dilaksanakan pada tahun 1985, peluang pendidikan juga semakin terbuka kepada golongan wanita. Selain keterbukaan masyarakat terhadap penglibatan wanita bekerja dan

JADUAL 10. Kadar Penyertaan Tenaga Buruh Wanita Melayu Mengikut Tahap Pendidikan, 1985-1990

Tahap Pendidikan	1985	1986	1989	1990
Tanpa Pelajaran Rasmi	47.6	46.9	46.6	44.5
Rendah	39.0	38.9	38	38.9
Menengah Rendah	29.8	30.9	33.6	35.1
Menengah Atas	52.4	52.4	52.6	55.7
Tingkatan Enam	51.8	54.6	56.9	58.8
Tertiari	86.6	84.8	84.3	85.2

Sumber: Disesuaikan daripada Laporan Penyiasatan Tenaga Buruh, 1985-1990. Jabatan Perangkaan Malaysia. Kuala Lumpur.

dasar kerajaan yang membantu golongan ini, nyata pendidikan merupakan indikator yang akan turut menentukan penglibatan wanita Melayu dalam ekonomi Negara (Nik Safiah Karim 1990).

Jadual 10 membuktikan bahawa peluang pendidikan yang diberikan kepada wanita Melayu sangat terbuka bahkan telah memberikan kesan positif kepada golongan ini. Pencapaian akademik wanita Melayu dalam 3 peringkat yakni menengah rendah, menengah atas dan juga tertiar dalam tempoh 5 tahun selepas Dasar Wanita Negara diperkenalkan memberikan gambaran bahawa golongan ini juga ingin dan mampu mengejar peluang pendidikan yang ada di negara ini. Bagi peringkat menengah rendah dan menengah atas, peningkatan yang konsisten ditunjukkan dengan purata peningkatan dari tahun 1985 hingga 1990 ialah sebanyak 1.2% dan 1.1%. Manakala bagi pencapaian akademik wanita Melayu dalam peringkat tertiar pula meskipun terdapat penurunan pada tahun 1986 hingga 1989 namun, dapat dilihat bahawa jumlah tersebut semakin meningkat dan berterusan.

Jelas, wanita Bumiputera Melayu semakin memperlihatkan potensi mereka sebagai tenaga kerja yang sangat penting. Pembangunan yang dikecapi oleh Malaysia turut sama membawa kepada peningkatan penyertaan wanita Melayu dalam ekonomi. Penglibatan dalam pelbagai bidang ekonomi terus berlaku membuktikan peranan mereka yang semakin ketara tahun demi tahun.

JADUAL 11. Guna Tenaga Wanita Melayu Mengikut Sektor, 1995-2010 (%)

Sektor	1995	2000	2005	2010
Pertanian, perhutanan, ternakan, perikanan	13.4	9.9	6.9	5.1
Perlombongan dan kuari	0.3	0.2	0.2	0.3
Pembuatan	34.2	32.2	24.5	18.8
Elektrik, gas dan air	0.3	0.2	0.3	0.8
Pembinaan	1.1	1.2	1.5	2.0
Perdagangan borong dan runcit, hotel dan restoran	16.4	18.6	22.5	22.3
Pengangkutan, penyimpanan dan komunikasi	2.0	1.9	2.3	3.4
Kewangan, insurans, harta tanah dan perkhidmatan perniagaan	4.6	5.6	7.5	4.1
Perkhidmatan lain	27.7	30.3	24.5	43.3

JADUAL 12. Kadar Penyertaan Tenaga Buruh Wanita Melayu, 1975-2000 (%)

1975	1980	1985	1986	1989	1990	1995	2000
47.2	44.2	43.4	43.6	44.4	45.8	43.6	45.3

Sumber: Disesuaikan daripada Laporan Penyiasatan Tenaga Buruh, 1975-2010. Jabatan Perangkaan Malaysia. Kuala Lumpur

Jadual 11 memberikan gambaran bahawa peningkatan penglibatan wanita Melayu dalam ekonomi negara. Pemilihan pelbagai industri juga menggambarkan bahawa wanita Melayu kini lebih berpeluang untuk terlibat dalam apa sahaja bidang yang diingini hasil daripada pendidikan, kemahiran serta bantuan dan sokongan yang diberikan kepada mereka. Sektor pembuatan dan perdagangan borong dan runcit serta hotel dan restoran masih menjadi pilihan kepada wanita Melayu dengan jumlah penglibatan pada tahun 2010 ialah 18.8% dan 22.3% masing-masing. Tumpuan juga diberikan kepada perkhidmatan lain dengan sektor pendidikan mencatatkan kadar tertinggi sebanyak 17.9%. Penglibatan wanita Melayu dalam sektor perkhidmatan lain ini juga membuktikan bahawa wanita Melayu lebih cenderung untuk terlibat dalam sektor awam berbanding swasta. Peluang pekerjaan, kurangnya persaingan daripada kaum lain berkemungkinan menjadi faktor wanita memilih sektor kerajaan. Namun, harus diteliti bahawa kadar penyertaan wanita tenaga buruh wanita Melayu ini masih tidak konsisten daripada segi kenaikannya. Walau bagaimanapun, menjelang tahun 2000, peningkatan kembali dicatatkan dengan jumlah kadar penyertaan adalah sebanyak 43.5%. Pergerakan yang turun naik ini masih memberikan gambaran bahawa masih wujud ruang dan potensi yang dimiliki oleh wanita Melayu namun tidak diakses sepenuhnya. Penelitian dan kajian terhadap persoalan ini haruslah dijalankan bagi memastikan bahawa peningkatan kadar penyertaan wanita Melayu dapat dikekalkan tahun demi tahun.

Tuntasnya, wanita Melayu pascamerdeka menunjukkan tanda positif dari aspek penyertaan mereka dalam bidang ekonomi. Meskipun ketinggalan berbanding kaum lain terutamanya masyarakat Cina, namun wanita Melayu masih terus mengejar. Antara faktor yang mempengaruhi perkembangan ini ialah dengan bermulanya peralihan wanita Melayu untuk terlibat dalam pelbagai bidang ekonomi dan tidak hanya tertumpu kepada satu-satu bidang ekonomi sahaja. Kepelbagaian bidang ekonomi dan peluang untuk wanita Melayu menceburinya ialah dimungkinkan oleh dasar dan dukungan kerajaan bagi memajukan ekonomi negara. Hasrat kerajaan bagi memajukan ekonomi dengan berlandaskan kepada kaedah meningkatkan guna tenaga tempatan nyata merupakan idea yang berkesan dan dapat membantu semua pihak. Kaedah '*win win situation*' ini dapat meningkatkan ekonomi negara dan rakyat pada masa yang sama.

Satu isu yang tidak dapat diketepikan ialah sejauh mana dasar dan pentadbiran kolonial dalam ekonomi telah membentuk suasana ekonomi di Malaysia setelah mereka. Pembahagian fungsi ekonomi yang berbeza antara kaum telah mempengaruhi penglibatan bukan sahaja wanita malahan merangkumi sebuah bangsa sekali gus dalam ekonomi. Masalah ekonomi yang membawa kepada kemudaratan dalam aspek sosial ini telah dialami oleh negara yang masih bertatih setelah mencapai kemerdekaan. Malapetaka 13 Mei akhirnya

terjadi dan memberikan kejutan kepada negara dan membentuk dasar ekonomi negara pada tahun-tahun berikutnya. Nyata, dugaan yang dialami sebenarnya memberikan negara peluang untuk menilai kembali setiap dasar yang dilakukan terutamanya dalam ekonomi. DEB menjadi momentum baru kepada pentadbiran ekonomi negara. Namun persoalan sejauh mana kejayaan dan pencapaian dasar tersebut tidaklah menjadi persoalan utama kajian ini. Namun, tidak dapat dinafikan dasar ini telah membantu bangsa dan wanita Melayu.

Wanita Melayu telah membuktikan keupayaan mereka untuk turut sama menyumbang kepada ekonomi negara yang semakin maju. Golongan ini mampu menjadi tenaga kerja yang penting sekiranya diberikan peluang dan bimbingan. Sokongan dan dukungan masyarakat serta kerajaan dengan pelbagai insentif telah mengasah lagi potensi golongan ini. Sekali lagi, pendidikan dan kemahiran menjadi isu yang penting dalam meneliti perkembangan penyertaan wanita Melayu dalam ekonomi. Tahap pendidikan akan sentiasa seiring dengan penyertaan dalam ekonomi. Pendidikan dan kemahiran mampu menentukan sejauh mana wanita Melayu mampu bersaing dan menunjukkan potensi diri mereka dan membuktikan golongan ini sangat penting dan perlu diberikan perhatian dalam usaha meningkatkan ekonomi Malaysia.

RUMUSAN

Bagi wanita Melayu keseluruhannya, pencapaian yang kini diperoleh merupakan tingkatan diri yang bukan sahaja didasarkan oleh usaha dan galakan kerajaan, namun kesedaran serta motivasi yang dimiliki telah menjadikan kaum ini lebih yakin untuk bersaing bukan sahaja dengan kaum wanita lain malahan kaum Adam sekalipun. Ketinggian tahap motivasi, kesungguhan dan keberanian yang dimiliki ini telah meletakkan wanita Melayu lebih maju dan ke hadapan berbanding tahun dan tempoh sebelum. Kini, penglibatan wanita Melayu dalam ekonomi tidak melihat kepada penyertaan dalam sektor pekerjaan hanya sebagai pekerja atau 'makan gaji' sahaja.

Sememangnya dapat dilihat bahawa perjuangan wanita dalam memperbaiki kehidupan dan ekonomi terutamanya bukanlah satu perjalanan yang mudah dan singkat. Kedudukan yang dicapai serta peluang yang diberikan oleh masyarakat dan pimpinan tertinggi pada hari ini merupakan satu manifestasi kejayaan wanita sejak dari zaman dahulu lagi. Bagi wanita Melayu meskipun telah lama menjadi rakyat negara ini, namun hak dan kuasa yang dimiliki mereka masih lagi samar-samar pada mulanya. Dikekang dengan adat dan pemikiran yang ada kalanya dilihat seakan-akan mengongkong menjadi antara faktor kemunduran mereka. Pemikiran feudalisme yang diamalkan juga menjadi satu diskriminasi kepada golongan wanita

Melayu untuk turut sama terlibat dalam ekonomi secara aktif. Kemunculan golongan imigran sekali lagi menambahkan beban yang ditanggung oleh golongan ini. Terpaksa berjuang, merebut peluang yang ada meskipun dengan keadaan dan pemikiran penjajah yang 'memilih bulu' dalam pengagihan ekonomi dan kekayaan bagi keuntungan mereka sendiri. Hanya apabila masyarakat Melayu sudah mulai serik dengan keadaan dan tekanan yang dihadapi, barulah usaha kepada mengubah keadaan tersebut berlaku. Perjuangan bagi memberikan lebih peluang kepada masyarakat Melayu mula disuarakan, hari demi hari semakin lantang. Masyarakat Melayu bagaikan tersedar dari tidur yang lena dan bahang perjuangan ini turut sama dirasai oleh golongan wanita Melayu.

Jika sebelum merdeka, perjuangan ini lebih kepada memberikan lebih keadilan yang sama rata kepada semua kaum di Tanah Melayu. Namun, perjuangan kemerdekaan yang dilaungkan adalah untuk bukan sahaja menjadikan Tanah Melayu sebagai negara yang berdaulat malahan hak dan kuasa pengurusan dan pemerintahan diberikan kepada anak watan. Wanita Melayu tidak dapat dinafikan mengharap agar kemerdekaan yang dicapai akan mampu memberikan satu lagi jaminan yang kukuh bahawa golongan mereka akan terus dibela dan akan lebih mendapat perhatian. Bab seterusnya akan melihat sejauh mana kedudukan wanita dan wanita Melayu khususnya dalam aspek penyertaan ekonomi dan pembangunan negara. Bangkit untuk memperjuangkan hak sendiri bermula dengan perjuangan politik sehingga kepada kesamarataan dalam pendidikan dan ekonomi, wanita Melayu selepas pascamerdeka telah menampakkan peluang untuk memajukan diri. Dalam keusahawanan, golongan ini kini cuba untuk meletakkan diri mereka dan berusaha menyaingi wanita dan kaum lain. Penubuhan syarikat milik wanita Melayu dari pelbagai jenis dan saiz akan menjadi petunjuk kepada sejauh mana wanita Melayu kini telah mengalami anjakan paradigma yang meletakkan mereka sebagai salah satu aset pembangunan negara dan mampu meningkatkan ekonomi negara dan bangsa Melayu khususnya.

RUJUKAN

- Andaya, B. W. & Andaya, L. Y. 1982. *A History of Malaysia*. London: The Macmillan Press Ltd.
- Del Tufo, M. V. 1942. *Comprising the Federation of Malaya and the Colony of Singapore: A Report on the 1941 Census of Population*. London: The Crown Agent.
- Donald, L. P. L. 1984. *Female Labour Supply in Malaysia*. Phd. Thesis. Department of Political Economy. University College London.
- Firth, R. 1946. *Malay Fisheries: Their Peasant Economy*. London: Routledge and Kegan Paul.
- Fraser, H. 1939. *Annual Report on the Social and Economic Progress of the People of the Federated Malay States for 1938*. Kuala Lumpur: Federated Malay States Government Press. 1939

- Hasnah Ali. 1996. Guna tenaga dalam sektor ekonomi. Dlm. *Wanita dan Pekerjaan*, disunting oleh Rahmah Ismail & Zaini Mahbar. Bangi: Penerbit Universiti Kebangsaan Malaysia
- International Bank for Reconstruction and Development. 1955. *Report on the Economic Development of Malaya*. London: John Hopkins Press.
- Jamilah Ariffin. 1978. Penghijrahan buruh wanita Melayu ke sektor perkilangan: Suatu masalah ekonomi Bumiputera. Kertas Kerja. Konvensyen Ekonomi Bumiputera. Anjuran Fakulti Ekonomi dan Pengurusan. Universiti Kebangsaan Malaysia. 19-22 Mac.
- Khoo Kay Kim. 1999. Kerajaan dan politik: Pengalaman tamadun Melayu. Kertas Kerja.
- Laporan Penyiasatan Tenaga Buruh, 1975-2010. Kuala Lumpur. Jabatan Perangkaan Malaysia.
- Mohamad Abu Bakar. 1986. Pemodenan, pengislaman dan pembebasan wanita Melayu. Kertas Kerja Persidangan Antarabangsa mengenai Tamadun Melayu. Anjuran Kementerian Kebudayaan, Belia dan Sukan. Kuala Lumpur. 11-13 November 1986
- Nathan., J. E. 1922. *The Census of British Malaya 1921: The Straits Settlements, Federated Malay States and Protected States of Johore, Kedah, Perlis, Kelantan, Trengganu, and Brunei*. London: Dunstable and Watford
- Nik Safiah Karim. 1990. *Wanita Malaysia: Harapan dan Cabaran*. Kuala Lumpur: K Publishing & Distributors Sdn. Bhd.
- Rahmat bin Saripan. 1976. *Pembukaan Negeri Melaka*. Kertas Kerja Seminar Sejarah Melaka. Anjuran Kerajaan Negeri Melaka. Melaka. 14-16 Disember. 1976
- Chamhuri Siwar & Surtahman Kastin Hasan. 1999. *Ekonomi Malaysia*. Edisi ke-4. Petaling Jaya: Pearson Education (M) Sdn. Bhd.
- Winstedt., R. O. 1961. *The Malaya: A Cultural History*. Edisi ke-6. London: Routledge & Kegan Paul
- Vlieland., C. A. 1932. *British Malaya: A Report on the 1931 Census and on Certain Problems of Vital Statistic*. London: The Crown Agent for the Colonies.
- Yahaya Abu Bakar. 1994. *Melaka: Pentas Pertembungan dan Dialog di Alam Melayu dalam Abad ke-XV dan ke-XVI Masehi*. Kertas Kerja Konvensyen Kebangsaan Sejarah Malaysia, 16-18 Ogos.

Nordin Hussin, Ph.D.
 Rahilah Omar, Ph.D.
 Siti Fathihah Abd Latif
 Pusat Pengajian Sejarah, Politik dan Strategi
 Fakulti Sains Sosial dan Kemanusiaan
 Universiti Kebangsaan Malaysia
 E-mail: rahilah@ukm.my